

吳縣志卷第五十四

兵防考二

兵事下

明世宗嘉靖三十三年六月五日倭寇燒劫閶門至楓橋八日賊分兵南至橫山焚掠殆遍閶門一帶蓄積纖悉無遺有逃之湖中山奧者賊皆窮其所至有求入城中者恐漏奸細不許兵備副使任環愍之時啓門盤詰而進所全活不可勝計九日賊回上津橋環與總兵解明道出擊之殺二十餘人生擒一人賊退至楓橋十一日賊將歸柘林懼東北兵阻乃出石湖趨吳江三十四年五月九日倭賊至楓橋分一支往木瀆西山等處燒劫十三日兵備任環與總兵湯克寬等提兵至木瀆賊入太湖焚劫洞庭兩山一鯨爲團長徐木等阻截自黃麻門從衝山漫山而下一鯨爲耆舵周瓚等所迫至獨山從無錫境去遇官兵不得進還入太湖二十六日賊進胥口次日由閶門齊門常熟而去十月十三日流倭五十三人先自餘姚渡錢塘歷徽甯蕪湖抵南京歷溧水宜興無錫欲北至常熟沿海以趨柘林轉戰三千餘里所嚮無敵至是突至滄墅巡撫都御史曹邦輔召官屬令曰所不

戮力滅賊但出境者斬首以徇復戒府縣官賊滅而後進城聞者股慄是夜官兵射死五賊賊畏官兵難犯從間道沿山夜行擒二人欲導出海二人故導之過閭門謂城上曰吾往絕地可來擊之遂引至寶帶橋郭巷三面阻水官兵圍困賊忿鬪二人十六日夜潰圍過五龍橋奔梅灣二十日奔靈巖山二十一日官兵搜伏斬首七級賊夜奔鳳凰池二十五日奔木瀆復奔前馬橋二十七日邦輔親督副使王崇古海防僉事董邦政合兵擊賊賊死戰我兵奮勇嚴家兵父子五人當其前鋒斬二十七級指揮張大綱崑山生員陳淮皆戰死賊夜遁之黃墅沙欲渡湖巡船阻之奔楊家橋僅存二十二賊伏田野中官兵追逼武生車梁獨以兵張兩翼鼓噪索之賊遂出梁招官兵還擊賊遺金帛誘我兵陷一絕巷中官兵圍之矢砲叢發賊滅無遺

三十八年大旱歲大祲城中惡少誇拳勇武力相結爲徒戲擊傷人折肢體無敢喘焉未暮卽剽掠無忌飲坊市稍忤則碎其器陵暴其婦女衢巷遇人則擊觀其奔逸恐懼以爲笑所至閭無人皆堅閉藏匿走不及者有所持荷皆委棄不敢顧其主首皆有名籍已遍城內外至吏書與隸方伎屠販之屬皆入其盟良家子亦往往墮其中巡撫都御史翁大立

知府王道行廉其狀急掩捕得數十人分繫府縣衛四獄拷訊未肯承掠死一二人其黨遂破禁所持械而出斧臺門縱火燬署突至府治設備多人不得肆又突至長洲縣治猝不能格并出繫囚燔寮舍舉城震動勒官兵屯駐吳縣知縣曹自守與王道行合計閉城大搜悉得諸兇徹夜窮捕至曉始定次日俱伏法奏聞

萬歷二十九年下令起稅織造太監孫隆駐蘇督稅城中積棍多納賄給劄營充委官分列水陸要衝乘軒張蓋遇販遇商公行攫取民不堪命又機戶牙行廣派稅額相率改業傭工無所趣食集衆徐元顧雲錢大陸滿等二千餘人推崑山人葛成爲首分作六隊每隊一人前行搖蕉扇爲號後執絞棍隨之矢誓倡義不取一錢先從葑門起於滅渡橋捶斃王建節午間又斃徐怡春長洲知縣鄧雲霄先擒委官頭目湯辛徐成下獄謝衆晝夜不息至七日又擁至潘行祿周仰雲顧松郭巖顧澤張宜莫皂隸及孫顧等十家燬其室廬器物斃其戚屬雲霄見勢洶湧再械辛成二兇於圓妙觀衆裂其尸本縣知縣孟習孔以利害曉示衆益忿轉逼隆署隆越牆走匿民舍得免八日又言諸稅官從東城巨室貸金營委各執炬焚其居第知府朱燮元偕推官朱一龍以恩義勸諭始解散兵備按察使鄒

堀自太倉聞變馳至檄捕首從葛成等欣然就獄受榜笞無悔擬編管窮微至四十一年
巡按御史房壯麗特請矜宥吳人嘉葛成義改名賢文文肅公題其墓曰有吳葛成之墓
三十六年大水七月城中游手結聚成羣隨路搶奪巡撫都御史周孔教令坐營官姜良佐
領健卒候之通衢擒獲爲首三人綁解答死衆散逸

天啓六年三月五日錦衣官旗至蘇止西察院逮御史吳江周宗建索賄千餘金未遂越五
日開讀宗建受詔桎械加項絆手足又二日賄足乃行金鼓前導驅宗建囚跣行道中官
旗乘輿馬夾之士民憤涕至十五日逮吏部員外郎周順昌者復至漏下一鼓知縣陳文
瑞懷牒詣順昌家順昌慷慨談說然燭危坐味爽入城士民千百人隨行呼冤沸天順昌
初至縣署衆從之縣署撫按擬卽日開讀官旗責賂如宗建未盈因定十八日午時順昌
從縣署出執香哭者填戶塞衢從之西察院諸地方官皆在各學諸生亦漸集抗白撫按
宜疏救惛不應官旗叱速讀且手桎械諸具擲地叱加順昌衆執香者哄起官旗拔劍向
擊或從後掣得轉擊官旗官跪請命掣者責之曰人傳逆魏矯旨信耶官旗懼死唯唯衆
益大哄曰吾等以爲奉上旨今乃出魏奄耶遂前共奮擊旂尉死一人知府寇慎知縣文

瑞翼順昌歸空署中迄申哄稍已巡撫都御史毛一鷺巡按御史徐吉合疏報聞至二十五日順昌以子夜出胥門官旂踉蹌而趨會陰雨衆不及聚乃達旦啓行城內外聞之無問男婦悲哀失聲又知撫按疏未報行期豫報擠死旂尉且緝諸哄擊者閱月復傳僞詔將屠蘇州城人心惶懼顏佩韋沈陽馬傑周文元楊念如五人挺身出承曰擊殺官旂者吾等五人也遂以五人梟首結案

崇禎十一年八月洞庭東山大盜宋毛三就擒先時山中亡命數十成羣日賭博夜剽掠羽黨漸繁巡司保甲莫制巡撫都御史張國維督擒渠魁屠五金能等正法衆乃潛遁至是聞江北流寇震鄰軍門提師赴皖盜夥大集據山依險將謀舉事盟結捕役爲腹心官府動止無不預知籍隸富戶姓名傳檄勒其貢貲稍不遂意卽時登刼國維察知先拿通賊捕役許益陳升陸魁等重刑下獄隨命把總陳國計入山搜捕選精銳設布各路絕其奔逸毛三窘匿林莽中先繫妻孥迹其窟穴遂得成擒賊部長自縊者七人俯首就縛者二十二人脅從聽撫毛三等梟示江南大患頓消十月橫金奸惡唐左耕王四李南洲查賢韓佛壽等借蝗災爲由訛言倡衆糾合沿湖三十餘村刑牲誓神村推一長籍羅姓名約

佃農勿得輸租業主有徵索者必沈其舟斃其人愚民煽惑操戈執械鳴金伐鼓聚及千衆焚廬劫資李南州適赴縣偵探知縣牛若麟亟擒下獄其黨復約千人束薪負背持挺入城若麟榜諭脅從聽其自新旋獲左耕等五人正法事遂息

十三年米價騰貴六月朔城東北隅奸民聚亂三日辰巳時搶婁門監生姚江家不得志合城鼓煽巡撫都御史黃希憲禁之不悛十五日復聚搶舉人章象鼎家隨分路擄掠米肆麵鋪猖狂愈甚木瀆光福洞庭兩山等處俱蠢動知府陳洪謐推官倪長圩知縣牛若麟揭報軍門猝發令箭擒爲首周士陳習志二人笞斃暴尸通衢衆始遁

十四年大饑正月十八日市棍龔大貢子洪江太等聚百人以丐食爲由擁搶承天寺僧舍推官倪長圩偵驗得實密報巡撫都御史黃希憲立擒梟斬餘衆遁逸

以上乾隆縣志

清世祖順治二年六月乙卯清兵入蘇州屬縣以次皆下時清豫親王多鐸已據金陵傳檄東下募吳縣人周荃副前鴻臚寺少卿黃家鼐入郡安撫家鼐遇故明監軍楊文驄潰兵被殺清軍至文驄兵逃去士民各書順民二字於門持羊酒迎候閏六月癸巳薙髮令下湖寇突入葑門頭纏白布亂民從之一時洶洶兵部侍郎李延齡巡撫都御史土國寶

遣兵追捕立即解散而城中幾遭屠戮國寶作勸民歌招諭遠近荃每進說多所存活吳江吳易等出沒太湖崑山王佐才等嬰城拒守未幾皆敗

咸豐三年夏四月丁丑粵軍薄蘇城長州縣知縣李翰文元和縣知縣馮樹勳部下廣勇開門迎之忠王李秀成遂入踞城巡撫徐有壬代理按察使朱鈞蘇州府教授張鏡純死之當蘇州之亟也布政使薛煥以外交事奉旨赴滬免於難遂擢巡撫上海道吳煦兼署藩司以上海爲行省及是青浦松江連破始戒嚴煦識美利堅廢將華爾才令率西勇助守是爲用西兵之始庚申取松江移攻青浦華爾率西勇登城清兵不進華爾傷乃歸勇亦遣去厥後松江再破又取之乃令華爾入守以西法部勒清兵辰山之捷清帝賜名常勝軍始五百人遞增至四五千八六月秀成大舉來攻戊子復取松江秋七月癸巳朔退甲午攻上海時城勇僅千人煦借西兵千人偕守始用開花礮發必中粵軍以爲神戊戌宵退戊申攻入金壇知縣李淮參將周天孚艾得勝死之八月甲寅攻太倉鎮洋縣知縣吳樸遇伏死乙亥城破都司鄧應樞死之是日常熟亦破上海自粵軍退避難者四集南市釐捐日旺逾年募勇至四五萬臨陣輒走恣行劫掠民苦之時兩江總督曾國藩軍已克

安慶諸將遵江東略兵力甚厚蘇紳顧文彬自楚歸知其狀始創乞援之議煦顧任饒事遂屬太倉錢鼎銘往國藩許之十有一年十一月壬子杭州破慕王譚紹洸合兵十餘萬攻松江常勝軍擊走之遂攻浦東遠近守兵四五萬盡潰上海大震西人通意蘇紳潘曾瑋願助戰煥與團練大臣龐鍾璐欲勿許顧勢日亟乃聽之議甫成十有二月庚午粵軍入奉賢其明日入南匯又明日入川沙金山衛城進逼上海投書西人令毋助清詞甚倨西人怒拒之嚴陳以待粵軍聞之解去同治元年春正月復攻松江踞廣德林衆數萬華爾率五百人出擊大勝之進兵辰山天馬山復會英法兵各五百人取浦東之高橋蕭塘鎮二月壬申粵軍入金山縣是月煦雇輪船十赴安慶迎師國藩疏薦前福建延建邵道李鴻章令總統程學啓等軍率勇六千東下復令總兵黃翼升李朝斌水師助之期後至三月庚寅鴻章等行越翼日至滬當是時江以南浙以西餘五城湖州勢最孤馮子材率國樑舊部守鎮江常勝軍守松江亦屢瀕於危上海寶山倚西援延喘息民望皖軍如望歲焉丙申金山縣粵軍退夏四月乙卯華爾及英人何伯法人卜羅德取嘉定丙寅取青浦丁卯鴻章署巡撫西人請會攻浦東鴻章令潘鼎新等出周浦當北路是爲浦東軍華

爾及西人當南路由金山縣攻南橋辛未取之下羅德陣沒粵軍走柘林壬申追敗之癸未取柘林乙亥取奉賢鼎新等敗粵軍於杭頭於新場時煥將去知府李慶琛以立功說之煥畀勇五千攻太倉軍城東板橋粵軍不出是月辛未秀成率聽王陳炳文納王郅雲官救之衆數萬慶琛軍潰死參將姜德退保寶山粵軍尾至爲所敗遂攻嘉青華爾聞之歸守青浦戊寅西兵至嘉定之南翔見粵軍衆留二日庚辰突圍入城既而棄嘉定挾中西守兵出走華爾既去鼎新分兵守南橋己卯攻南匯粵軍守將吳建瀛請降許之是夕鼎新使劉銘傳馳還周浦備中變五月壬午朔鼎新入城受降秀成次子自金山衛至敗之糾川沙粵軍又至又敗之遂尾之丙戌取川沙粵軍之再得嘉定也分兵趨松江上海廣富林者入松江之要隘也泗涇者入上海之要隘也煥皆撥兵二千守之五月朔粵軍攻泗涇守兵潰次日廣富林兵退保松江粵軍從之華爾聞自青浦馳入松城固守泗涇粵軍斜趨虹橋距清營十二里鴻章先檄諸軍會援丁亥學啓敗粵軍於虹橋戊子又敗之進平七堡而松圍益急華爾盡昇洋槍洋礮列城上轟擊兩晝夜不絕聲粵軍不動常勝軍之分攻甯波者尋至大敗之豆腐浜始退甲午西人偕華爾棄青浦如嘉定事松圍

既解粵軍復屯泗涇及廣富林一帶聯絡三四十里壬寅分十二支四面馳突圍學啓新橋營數十匝鴻章聞之親勒兵馳救張樹聲張遇春郭松林等從鴻章兵離皖數月摩厲久勇氣十倍學啓望見鴻章旗亦突圍出內外夾擊粵軍大敗奔還泗涇甲辰乘勝攻泗涇粵軍走是月己丑粵軍入湖州羈守紳趙景賢久之終不屈被殺初鴻章之至也廷議謂宜取建瓴之勢自鎮江進兵屢促赴鎮鴻章心知不可而嫌於懷安計未決至是進取之機在握粵軍亦全力攻上海勢無可離始以實聞赴鎮之議乃寢初清兵取柘林奉賢不能守粵軍復入是月壬辰鼎新等取奉賢守之柘林粵軍走令降人劉玉林守之粵軍退保金山衛城遂約華爾會攻自出柘林攻漕涇當東路華爾出張堰當西路六月壬申取衛城自是浦東無粵軍秋七月丙申望學啓華爾再取青浦庚子紹洗率兵十萬薄城總兵黃翼升水軍自梁山新至擊走之移攻北新涇及法華一帶距清營數里降人劉玉林戰沒圍况文榜等營相持十日鴻章牒翼升學啓華爾各軍之半趨泗涇七堡出其後以達於北新涇而親勒兵會之學啓等敗之於七堡同知韓正國死之八月癸丑鴻章會諸軍大破之毀其營數十粵軍渡吳淞北去北岸舊有營七復踞之無何翼升華爾至毀

七營粵軍回攻北新涇銘傳等擊卻之丙子翼升取澱山湖西岸石壘自松入蘇水陸要隘也是日華爾取浙之慈谿傷於胸越兩日卒閏月丙戌翼升取吳江之蘆墟九月庚戌朔常勝軍會西兵再取嘉定紹洸復大舉分兩路北窺南翔南窺黃渡南路兵尤衆自四江口迤邐及青浦連營百餘癸亥圍劉士奇鄭國魁等營皆告亟鴻章率學啓及弟鶴章等救之丙寅敗之於四江口南岸戊辰又敗之北岸辛未諸軍集遂分三路進學啓居右松林居左銘傳居中自以親兵繼之三將同時督洋槍隊逼粵軍營拔籤逾濠礮彈雨注皆鄰行冒烟焰直入諸軍大呼繼進無不一當十粵軍大潰擒斬數千人人馬落水死者無算水爲不流餘衆退至崑山自是松滬無粵軍冬十有二月戊寅朔常熟駱國忠董正勤等殺其將以城降清又以攻克福山許浦自效正勤尋戰沒癸未秀成攻常熟國忠固守復取福山時學啓鶴章方攻太倉益之以奧倫常勝軍二千人初華爾臨卒薦白齊文自代會國藩檄常勝軍攻九洲鴻章令煦率以往白齊文求饒無厭留不行毆傷前糧道楊坊且叛鴻章罷之則竊我小輪船餽粵軍以降久之不爲粵軍信入粵溺於海奧倫者西人薦以代白齊文者也甲午薄城奧倫怯臨濟趙超粵軍蜂擁出乃退旣而自慙辭

去西人又薦戈登代之二年春正月丁卯煥內召鴻章先已授巡撫至是兼署通商大臣
牒翼升水師三營浮海攻福山又撥常勝軍五百人以鼎新劉秉璋領之乘輪船偕發值
大風雨海潮若山師船小不耐海颶多覆溺輪船大不能及岸久之始入港相持又兩月
餘二月甲戌常勝軍始轟塌港東石壘諸軍繼進并擊港西粵軍殪之常熟圍解是月甲
申守金山副將覃聯陞取平湖新倉鎮死之三月學啓鶴章復攻太倉乙卯會王蔡元隆
詐降郊迎請入城不許無何伏發鶴章傷於足學啓殿軍而退初鴻章檄戈登攻崑山及
是令折而東會攻太倉辛酉破西門元隆棄城走嘉興厥後降於浙軍云癸亥學啓乘勝
攻崑山丁卯鴻章巡視諸營尋還滬夏四月癸未紹洸等四王取雙鳳攻太倉鶴章與鏖
戰三晝夜粵軍大敗退入崑城學啓破城外營二十有四殺萬餘人紹洸不敢出己丑學
啓戈登先襲破進義鎮令諸軍急攻城庚寅破之於是集議攻蘇州或謂取無錫江陰則
蘇州不戰自舉或謂置二縣或謂取江陰置無錫或謂吳江與嘉湖粵軍通消息宜先取
鴻章以後二議爲善學啓進軍蘇城東北之蜆子山爲前驅是爲蘇州軍是月甲申翼升
銘傳水陸攻楊舍城江陰常熟之間江海之交要隘也毀其營三十餘遂偕鶴章松林攻

江陰是爲關外軍江陰粵軍合侍王李世賢護王陳坤書潮王黃子隆章王普王衆十萬
旌旗綿亘數十里經楊舍達於顧山聲言趨常熟蘇州粵軍亦至勢頗熾五月丁卯與清
兵鏖戰兩晝夜大敗勳王廣王閉門誓死守六月丁亥學啓取花涇港戊子士奇取同里
己丑清軍入吳江學啓守之辛卯嘉興粵軍至丙申蘇州粵軍至皆擊卻之秋七月總兵
李朝斌旣取九洑洲率太湖水師至滬鴻章與偕巡水陸諸軍乙卯發上海自朱涇抵風
涇入浙之西塘折而北遵太湖涇吳江達蘇州時浦東軍秉璋鼎新楊鼎勳西人馬格里
等方攻風涇丁巳鴻章至是日一鼓取之毀石壘三土營一軍卡七擒斬三千餘人進攻
西塘獲王宗廖某等四人自西塘至千窯粵軍連營二十里皆破壬申雲官攻蕩口營滕
嗣武擊敗之鴻章在蘇郊率王東華等馳救粵軍走追至黃埭破其營復追至城下而還
甲戌晦江陰合圍是夕有降人導清兵登城八月乙亥朔取江陰是役也總兵賴榮光死
之鴻章往勞師令關外軍相機前攻後援又令諸軍進逼蘇城以兵少不能合圍議水陸
各軍散布城四面首尾聯接但削平城外十壘卽城可下十壘者五龍橋寶帶橋蠡口黃
埭王瓜涇滄關觀音廟十里亭虎邱與泇濠土城而十部署旣定鴻章還滬學啓進次跨

塘逼婁門諸將亦分四面駐軍八月戊寅學啓取寶帶橋癸巳叛將白齊文坐輪船率兵數萬水陸並出朝斌戈登迎戰學啓又自黃天蕩截擊敗之壬辰秀成由齊門紹洸由葑門出清兵分拒之遂合而西北攻關外大橋角黃中元營鴻章救之粵軍以輪船爲先鋒礮船當其衝者沈之奪之常熟降人錢桂仁更名周壽昌者見事亟率數十人奪其船一殺其人衣其衣駛近輪船以火箭射之船迸裂聲震天地焚大小船八鶴章乘勢進擊粵軍大敗退保黃埭癸卯元隆及榮王廖發受自嘉興來攻七里橋營何安泰戈登擊走之九月丙辰學啓等取五龍橋嘉湖粵軍屢攻同里學啓謂非大創之將爲蘇軍南顧憂屬戈登守五龍橋自率克根木馬格里大舉南行已未戰於八坼大勝擒貴王陳得勝追至平望盡毀所過營乃旋師癸亥學啓等取蠡口冬十月甲戌朔取黃埭壬午翼升學啓戈登合水陸軍自黃埭繞入滬關敗來王陸順得兵毀營數十取滬關乃分道戈登取王瓜涇學啓取觀音廟學啓又偕克根木取十里亭於是城外十壘惟淞濠土城存土城者蘇城外多水粵軍依水爲小城下作窟室以避礮徧於六門而婁門外尤高堅甲申鴻章至軍責戰益亟己丑夜諸軍月霧中潛支浮橋垂成而粵軍覺戈登發炸礮學啓等千槍齊

舉而守陴者不動乃退辛卯秀成潛入城壬辰鶴章親督程戈兩軍分南北岸進攻婁門
戈登以準望法發開花礮土城石壘皆飛動粵軍退伏窟室中清兵支浮橋以濟忠慕二
王擁衆萬餘出鏖戰數十合且戰且退遂毀淞濠土城於是城外十壘盡矣總兵尹連陞
死之秀成知不可支癸巳率兵萬餘北去與紹洸慟哭而別雲官及比王伍貴文康王汪
安均甯王周文佳天將范啓發張大洲汪懷武汪有爲等八人介鄭國魁乞降願縛紹洸
爲贄鴻章許之戈登請學啓貫紹洸死學啓陽諾之而密諭國魁欲得死紹洸不欲得生
紹洸丁酉紹洸登陣有爲突刺之遂入幕府縱火殺其黨千人夜開齊門降戊戌獻紹洸
首於軍己亥鴻章入城尋還營令八人入見數以要挾之罪而斬之學啓之謀也學啓匹
馬入婁門誠衆毋動八人外不問二十餘萬衆咸嚮伏壬寅全軍入城初常勝軍克一城
必入城大掠鴻章先與戈登約毋入蘇城戈登頗恚至是責鴻章殺降招雲官子勝鏢與
同起居爲募廣勇千人且助之舉事蘇紳潘曾瑋夙與戈登習鴻章令百端曉譬之乃以
勝鏢付曾瑋事始寢關外軍自入無錫境十旬數十戰大勝者十有五毀粵軍營百餘冬
十月己亥秀成自蘇州率兵萬餘及輪船西兵攻萬壽橋營清軍小卻諸軍進援始勝秀

成北去是日鶴章取新安連取望亭翼升松林周盛波各軍出關會之於是蘇州軍與關外軍始合十有一月甲辰朔鶴章取惠山石卡樹聲取亭子橋乙巳復無錫進攻常州丁巳破之是日克孟河戊午敗坤書兵於城下癸亥句容章王合然王治王來援敗之追至西門外七里橋粵軍圍奔牛降人營銘傳馳救十有二月辛巳大敗之丙戌鶴章繼至毀其營三十餘焚輪船一奔牛圍解浦東軍既取西塘進攻嘉善之張涇匯冬十月癸巳戰不利參將王玉林死之秉璋傷於足甲午裏創出戰擊走粵軍十有一月丁未取張涇匯辛亥平湖陳殿選降於鼎新軍引清兵入城殺其不降者乙卯乍浦降丙辰海鹽及澉浦降戊午璦城粵軍攻鼎新營擊追之取璦城是月乙丑學啓朝斌攻平望丁卯學啓取九里橋黎里進師嘉善於是蘇州軍與浦東軍始合辛未嘉善陳占榜余嘉鼇降學啓秉璋入城先四日丁卯鼎新亦取沈蕩己巳取新豐學啓進攻嘉興三年春正月秉璋鼎新先後至丙寅毀北城外石壘七斬馘千清軍傷亡亦半之守備姜寶勝不進斬之以徇又取秋涇橋吳清橋丁卯取鹽倉橋庚午學啓督諸軍進攻肉薄登城噴筒雨下乃退總兵何安泰死之會湖州堵王黃文金攻盛澤令永勝往擊走之二月丁亥復猛攻礮聲三晝夜

不斷於煙焰中築月牆浮橋礮臺發大礮裂城十數丈己丑黎明學啓躍而上中槍仆部下士奇永勝等憤怒皆以筏渡簇擁登城秉璋等亦拔椿過濠入東門斬艇王劉得功發受猶巷戰其下死殆盡乃匿井中鉤出之梟其首城遂破學啓傷重還蘇三月甲戌卒戈登之從取蘇州也清廷錫予甚厚以故謁鴻章願釋前憾助攻宜興許之檄松林鼎新等會之正月辛酉抵城下毀附城營松林傷於肘嗣武傷於足甲子敗粵軍於上江橋又敗其援軍代王黃靖忠獲其船千丙寅壞其城粵軍西走進師攻溧陽二月癸酉破之甲戌移攻金壇列王江某襄王劉官方迎戰敗之斬列王追至城下都司張榮魁死之會無錫諸城告亟鴻章檄松林等東援而以吳毓芬代之先是提督鮑超由東壩南攻前年冬取高淳溧水三月丁未取句容辛酉取金壇毓芬至斬直王林得英於陣初諸王救常州屢攻銘傳營不動二月壬申朔大戰副將劉起守備彭昌諭等死之傷亡五百餘人屬霖雨連旬粵軍數萬薙髮裹械冒雨潛行東趨南關沙山周莊華墅楊舍常熟福山遠近散布無知者壬午同日易巾豎旗攻卡圍城無錫江陰常熟皆大警鴻章聞飛檄金壇軍舍之去常州軍堅壁勿戰餘軍分兵會援三日皆至癸未柝聲解江陰圍甲申鶴章解無錫圍